

## MUNISIPALITEIT BEAUFORT-WES

### Kennisgewing nr. 146/2005

Die Raad van die Munisipaliteit van Beaufort-Wes publiseer die onderstaande verordening met betrekking tot vullisverwydering, vir algemene kennisname.

### VERORDENING INSAKE VULLISVERWYDERING

#### Inleiding

Aangesien die Munisipaliteit van Beaufort-Wes ingevolge die Grondwet van die Republiek van Suid-Afrika (Wet 108 van 1996) wetgewende bevoegdheid het

EN AANGESIEN die Munisipaliteit die reg het om sy eie verordeninge insake vullisverwydering te bepaal;

Verorden die Munisipaliteit van Beaufort-Wes soos volg:-

1. Tensy onbestaanbaar met die sinsverband, beteken-

**“afval”** enige stof of bestanddeel wat nie as vullis of gevaarlike afval beskou kan word nie en sluit dit in sulke materiale soos motoronderdele, onderdele, klippe, rotse, sand, boumateriaal, bourommel of ander materiale wat gebruik word met die bou van geboue, olies, smeermiddels, vloeistowwe of soortgelyke stowwe.

**“besigheidperseel”** enige perseel wat soneer is vir ander doeleindes as enkelwoon doeleindes, landbougrond of onbepaald ingevolge die bepalings van 'n soneringskema, en sluit dit in enkelwoonpersele waar besigheidsaktiwiteite toelaatbaar is ingevolge 'n goedkeuring wat deur die Raad toegestaan is, en

**“beskik”** om van onslae te raak, opgaar, stort, stoor of plaas;

**“eienaar”** ook huurder, okkupeerder, inwoner, die persoon in beheer van 'n perseel, of enige persoon wat 'n voordeel uit 'n perseel verkry of daartoe geregtig is;

**“gevaarlike afval”** mediese afval en enige vullis, afval, stof of bestanddeel wat gevaarlik mag wees vir die omgewing, persone of ander lewende organismes of wat besoedeling kan veroorsaak of, wat na die mening van die Raad, gevaarlike afval uitmaak;

**“Hoof:Gesondheidsdienste”** die amptenaar wat in hierdie hoedanigheid vir die munisipale gebied aangestel is, of sy verteenwoordiger;

**“Ingenieur”** die amptenaar van die munisipaliteit wat in beheer is van vullisverwydering

**“landbougrond”** eiendom wat as sulks ingevolge 'n soneringskema soneer is en sluit dit in persele waaraan 'n onbepaalde sonering gekoppel is;

**“munisipaliteit”** die munisipaliteit van Beaufort-Wes;

**“Raad”** die raad van die munisipaliteit;

**“Tariefbeleidverordening”** die Tariefbeleidverordening deur die munisipaliteit aanvaar en afgekondig in *Provinsiale Koerant 6160* van 20 Augustus 2004;

**“vullis”** vrugte- of groeteskilte, vrugte- of groente afval, algemene huishoudelike afval, sowel as plantaardige tuin afval wat van so 'n grootte is dat dit in 'n vullisdrom of vullissak geplaas kan word, of enige ander stof wat na die mening van die Ingenieur vullis is;

**“vullishouer”** 'n goedgekeurde tipe vullishouer, vullissak, kartondoos of enige ander soortgelyke houer.

**“vullisverwyderingstelsel”** 'n stelsel waarvolgens vullis, afval of gevaarlike afval verwyder of mee weggedoen word deur die munisipaliteit, 'n privaatkontrakteur of 'n gemeenskap gebaseerde diensverskaffer;

2. Geen persoon mag op enige manier met enige vullis of afval wegdoen nie, tensy dit-
  - (1) ooreenkomstig die terme en voorwaardes van 'n vullisverwyderingstelsel is wat deur die Raad goedgekeur of gelewer word;
  - (2) ooreenkomstig 'n ooreenkoms is wat aangegaan is tussen die eienaar van die perseel en die Raad; of
  - (3) op of in 'n plek of 'n houer wat deur die ingenieur vir die doel opsy gesit is, en dan slegs ooreenkomstig die bepalings van 'n kennisgewing wat die voorwaardes aandui waarvolgens vullis of afval geplaas mag word.
  
3. Geen persoon mag-
  - (1) enige afval of gevaarlike afval in 'n vullishouer, straat vullishouer of enige houer wat deur die Raad ingevolge die bepalings van artikel 2 verwyder sal word, plaas nie;
  - (2) vullis, afval of gevaarlike afval verbrand nie;
  - (3) met gevaarlike afval wegdoen sonder die vooraf toestemming van die Ingenieur nie, en dan slegs ingevolge die voorwaardes en vereistes wat in die toestemming uiteengesit is.
  
4. (a) Waar enige vullis, afval of gevaarlike afval opgegaan, gestort, gestoor of opgeberg word in enige plek, ongeag of dit 'n private of openbare plek is, wat nie ooreenkomstig 'n goedkeuring van die Ingenieur is nie, of wat na die mening van die Ingenieur onooglik, 'n gevaar of 'n oorlas is of kan word, kan die Ingenieur 'n skriftelike kennisgewing beteken aan -
  - (i) die persoon wat regstreeks of onregstreeks vir sodanige ophoping, storting, opberging of plasing verantwoordelik is, en/of
  - (ii) die eienaar van sodanige vullis, afval of gevaarlike afval, ongeag of hy vir sodanige ophoping, storting, opberging of plasing verantwoordelik is of nie, en/of
  - (iii) die eienaar van sodanige grond of perseel, ongeag of hy vir sodanige ophoping, storting, opberging of plasing verantwoordelik is of nie,

waarin vereis word om sodanige aktiwiteit te staak en binne 'n bepaalde tydsbestek soos in die kennisgewing vermeld sodanige maatreëls te tref as wat die Ingenieur of die Hoof : Gesondheidsdienste mag goeddink om weg te doen met die vullis binne 24 uur en afval of gevaarlike afval binne 48 uur.

- (b) Indien die persoon of eienaar versuim om aan die kennisgewing te voldoen, kan die Ingenieur enige goedkeuring wat verleen mag gewees het terug trek en sodanige maatreëls tref as wat nodig is om op die koste van die persoon of die eienaar weg te doen met die vullis, afval of gevaarlike afval.
5. Die Hoof : Gesondheidsdienste mag enige voorwaarde of vereiste stel ten einde enige gesondheidsgevaar of oorlas te verhoed, te verwyder of te verlig.
  6. Op die datum van die publikasie van hierdie verordening, sal enige vullisverwyderingsdienste wat deur die Raad onderneem word, voortgaan soos die geval was voor die publikasie van die verordening.
  7. Die Raad kan verskillende vullisverwyderingstelsels in spesifieke gebiede wat deur die Raad afgebaken is voorsien of reël dat dit voorsien word.
  8. (1) Wanneer dit nodig word dat 'n bestaande vullisverwyderingstelsel verander word, 'n afgebakende gebied groter of kleiner gemaak moet word, of dat 'n nuwe vullisverwyderingstelsel in enige afgebakende gebied ingestel moet word, sal die Raad 'n proses begin waarvolgens die inwoners en/of die georganiseerde handel in die betrokke gebied ingelig word.
  - (2) Wanneer die Raad homself tevrede gestel het dat diegene wat 'n vullisverwyderingsdiens ontvang of gaan ontvang genoegsaam ingelig is, word die voorgestelde veranderinge of nuwe stelsel ingestel op 'n datum wat deur die Raad bepaal word.
  9. Die Raad kan ooreenkomste aangaan met private of gemeenskapsbaseerde diensverskaffers vir die lewering van vullis- en afvalverwyderingsdienste in enige area wat deur die Raad afgebaken is.
  10. Eienaars van persele waar 'n beheerliggaam bestaan, besigheidpersele en landbougrond is, is verantwoordelik om onafhanklike reëlings met betrekking tot die verwydering van vullis en afval te tref.
  11. In gebiede waar 'n vullisverwyderingsdiens deur die Raad onderneem word, kan die Raad 'n ooreenkoms aangaan met 'n beheerliggaam, die eienaar van 'n besigheidperseel of 'n landbougrond vir die lewering van 'n vullisverwyderingsdiens en/of die voorsiening van vullishouers aan die perseel.
  12. Die Raad bepaal die frekwensie en dae waarop vullis verwyder word.
  13. In gebiede waar die Raad 'n vullisverwyderingsdiens aan woonpersele lewer, sal die Raad periodiek voldoende inligting waarin die besonderhede van die diens verduidelik word, beskikbaar stel.
  14. Die Raad kan spesiale of addisionele vullishouers of plekke waar sekere tipes vullis of afval geplaas mag word, beskikbaar stel onderhewig aan die terme, voorwaardes en gelde wat die Raad mag vasstel.

15. Slegs vullis mag geplaas word in vullishouers wat deur die munisipaliteit verwyder word.
16. In daardie woongebiede waar slegs vullishouers gebruik word-
- (1) mag vullishouers slegs op sypaadjies geplaas word op die dae waarop vullis verwyder word;
  - (2) sal vullis wat uitgeplaas word maar wat nie in 'n vullishouer geplaas is nie, nie verwyder word nie;
  - (3) mag vullishouers nie op so 'n manier gevul word dat die deksel nie behoorlik kan toegaan nie;
  - (4) mag slegs vullishouers soos voorgeskryf deur die Raad, gebruik word;
  - (5) is eienaars verantwoordelik vir die gereelde, behoorlike en effektiewe skoonmaak van vullishouers, ten einde te voorkom dat omstandighede ontstaan wat dit moontlik maak vir vlieë om uit te broei, reuke te laat ontstaan, ens;
  - (6) bepaal die Raad die maksimum getal houers wat uitgeplaas mag word op enige dag waarop vullis verwyder word, en
  - (7) moet die eenaar seker maak dat skerp voorwerpe of ander voorwerpe wat verbygangers mag beseer, nie by sakke uitsteek nie.
17. In gebiede waar die Raad vullishouers voorsien, is die volgende bykomend tot die bepalings van Artikel 16 van toepassing-
- (1) die vullishouers bly die eiendom van die Raad;
  - (2) vullishouers mag nie vir enige ander doel as die plasing van vullis aangewend word nie;
  - (3) niks wat die vullishouer kan beskadig, mag daarin geplaas word nie;
  - (4) vullishouers mag nie vanaf die persele waaraan dit toegeken is, verwyder word nie;
  - (5) die Raad kan die eenaar verantwoordelik hou vir die vervangingskoste van 'n vullishouer as so 'n vullishouer verlore raak of beskadig word deur die nalatigheid van die eenaar.
18. In gebiede waar vullis verwyder word deur middel van sakke wat deur die eenaar voorsien word, mag slegs die tipe sakke wat deur die Raad voorgeskryf word, gebruik word.
19. Die Raad bepaal en hef tariewe en gelde ten opsigte van dienste wat ingevolge die bepalings van hierdie verordening deur die Raad gelewer word, ingevolge die bepalings van die Tariefbeleidverordening.
20. Geen persoon sal geregtig wees op vrystelling of 'n afslag op tariewe wat deur die Raad bepaal word, bloot op gronde daarvan dat so 'n persoon beperkte gebruik maak van 'n diens wat deur die Raad gelewer word.

21. Enige persoon wat enige van die bepalings van hierdie verordening oortree of versuim om daaraan te voldoen of versuim om aan enige bevel wat wettig daarvolgens uitgereik is, te voldoen, is skuldig aan 'n misdryf en by skuldigbevinding strafbaar met 'n boete.